



UMP tuan rumah dua Persidangan Antarabangsa Sistem Komputer

Oleh: NGAHZAIFA AB. GHANI

Universiti Malaysia Pahang (UMP) menganjurkan Persidangan Antarabangsa Kejuruteraan Perisian dan Sistem Komputer (ICSECS 2015) kali ke-4 bertemakan 'Virtuous Software Solutions for Big Data' yang diadakan serentak dengan Persidangan Antarabangsa Sains Komputer dan Pengurusan Maklumat (ICoCSIM) 2015 yang bertemakan 'Inovasi Semasa Teknologi Maklumat untuk Kehidupan yang Lebih Baik'.

Persidangan tiga hari yang bermula pada 25 Ogos 2015 yang lalu di Swiss Garden Beach Resort, Kuantan itu adalah anjuran bersama Fakulti Sistem Komputer & Kejuruteraan Perisian (FSKKP) dengan kerjasama Universiti Sumatera Utara, Politeknik Negeri Medan dan Amik-Stikom Tunas Bangsa, Permatangsiantar Indonesia.

Menurut Timbalan Dekan Pengajian Siswazah dan Penyelidikan, Dr. Mazlina Abdul Majid yang merupakan pengurus bersama pengurusan program itu, persidangan ini memberi peluang kepada golongan akademik dan industri berkaitan kejuruteraan perisian dan sistem komputer untuk bertemu serta membincangkan hala tuju pembangunan bidang ini pada masa depan.

"Pembentangan ucaptama disampaikan Profesor Dr Rajkumar Buyya dari University of Melbourne, Australia, dengan tajuk *Market-oriented Clouds and Big Data Applications*.

Ucaptama kedua pula oleh Profesor Dr. Kamal Zuhairi Zamli dari UMP yang berkongsi idea tentang tajuk *Exploiting Nature Inspired Algorithms for Combinatorial Interaction Testing*.

Begitu juga dengan persembahan menarik Profesor Dr. Jurg Gutknecht yang berjaya menarik perhatian peserta dengan perkongsian pengalaman berkaitan tajuk 'Medical IT: The Next Megatrend?'.

Turut berlangsung majlis makan malam meraikan para peserta yang dihadiri Dekan FSKKP, Profesor Dr. Jasni Mohamad Zain, Pengurus Yayasan Amik Tunas Bangsa Permatangsiantar, H.M.A Ridwan Syahputra dan Dekan Fakultas Ilmu Komputer & Teknologi Informasi, Universiti Sumatera Utara, Profesor Dr. Muhammad Zarlis.

Peserta juga berpeluang melawat beberapa destinasi tarikan di Kuantan termasuk Sungai Lembing, Muzium Galian dan Pusat Tenun Pahang sempena pengurusan persidangan pada kali ini.

